

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 1571 del 17/06/2021

Traduzione in ladino

La Jonta se à scontrà co la comunanza de San Giovanni di Fassa - Sèn Jan

En vender ai 11 de jugn la Jonta provinzièla se à binà a San Giovanni di Fassa-Sèn Jan. Dant de scomenzèr, l'executif se à scontrà, te senta de comun con raprezentanc de la istituzions, amistradores dal post e esponenc de la Comunanza. Tel scomenz l'ombolt Giulio Florian l'ha portà dant i argomenc de maor atualità per l'amministrazion de comun. Mobilità e viabilità, servijes de trasport, lurieres publics, scomenz de la ativitàdes turistiche, la colaborazion co l'Università en cont de n projet, l'atività del zenter per i vazins: l'è stat chisc i argomenc prinzipèi metui al luster a l'executif. À tout pèrt a la scontrèda ence la senadora Elena Testor, l'assessor regionèl Lorenzo Ossanna, l'conseier provinzièl Luca Guglielmi e l'Procurador Giuseppe Detomas.

Giuseppe Detomas l'ha metù al luster l'zenter per i vazins e l'servije che ge vegn arsegurà dal volontariat a la popolazion de diescmile jent che endèna la sajon turistica la doventa de 75.000 jent. L'ha domanà didament percheche l'servije posse jir inant.

L'president Fugatti l'ha sottrissà l'emportanza de la scontrèdes sul teritorie, per cognoscer miec i argomenc più emportanc per la comunanza. L'ha recordà i dans entravegnui ence te Fascia a cajon del tormen Vaia. L'ha ence palesà la determinazion da pèrt de la Jonta provinzièla de se cruzièr di projec e intervenc strutturèi per la mobilità col confermèr la volontà de finanzièr la varianta Cianacei-Ciampedel. Fin ades, l'ha dit, no l'è indicacions nazionèles segures en cont de vazinazions per i turis.

L'assessor al Turism Roberto Failoni l'ha dit otimist en referiment a la sajon da d'istà. L'ha recordà l'numer di avisc rresservé al setor e l'atenzion che ge vegn dat, tras la colaborazion e evenc sportives de gran emportanza, ence ai raions de aut level e da gran turism desche Fascia.

L'assessora a la sanità Stefania Segnana l'ha portà dant la situazion en cont de l'atività di vazins, sottrissan l'emportanza de fèr amò informazion e sensibilisazion ti confronc de chi che no à amò tout pèrt a la campagna, chest ence per miorèr te Fascia i dac che revèrda la vazinazions de la jent che à più che 60 egn.

L'assessora a l'agricoltura, bos, ciacia e pesia Giulia Zanutelli, tel recordèr ence ela i dans entravegnui a cajon del tormen Vaia, l'ha volù rejonèr en cont de la besties che magna cèrn, metan al luster che l'è dò che vegn endrezà na scomenzadiva de informazion aposta per turis e per la popolazion che stèsc te chisc raions en cont de coche ge vel se comportèr. L'è dò che vegn rejonà, l'ha dit, co la autoritàdes nazionèles per meter en segurezza la mont e la zootecnica, patrimonie de nosc raion.

Ence l'assessor Lorenzo Ossanna l'ha fat sie salut, se palesan a na vida positiva su l'usanza da pèrt de la Jonta provinzièla de se binèr sul teritorie. La senadora Elena Testor l'ha metù dant l'atività che vegn fat a Roma per meter al luster i raions da mont e l'ha recordà l'contegnù del fon per la mont. L'conseier provinzièl Guglielmi l'ha portà dant l'contegnù de n provediment legislatif, metù dant da el e aproà ti dis passé da dut l'Consei provinzièl a una, co l'obietif de recognoscer l'Comun general de Fascia tel Consei de la Autonomies Locales.

Traduzion di Servijes Linguistics e Culturèi del Comun general de Fascia
(Traduzione a cura dei Servizi Linguistici e culturali del Comun general de Fascia)

(cdt)